



荆楚文庫

百柱堂全集
(下)

〔清〕王柏心 著
張俊綸 點校

荆楚文庫編纂出版委員會
崇文書局



荆楚文庫

百柱堂全集

(下)

〔清〕王柏心 著

張俊綸 點校

荆楚文庫編纂出版委員會

崇文書局

題陳生看山樓

芙蓉秀作好峰巒，送與元龍樓上看。絕世名姝凝遠黛，渡江奇客竦危冠。不須藜杖攀岩訪，只訝松風逼座寒。天下荆關無覓處，誰知邱壑在胸蟠。

已超宏景三層閣，如對廬山九疊屏。靈氣諸峰皆峻拔，楚江千里此關扃。岳雲南下長飛紫，峽勢西來不斷青。從子卧游真足老，征帆何苦事漂萍？

仕兒就試詩以示勸

失母憐渠早，離兄甫自今。業多因亂曠，誨不敵慈深。振羽辭鶯谷，長鳴繼鶴陰。榮親在稽古，行矣莫霜襟。

璿玉篇

璿玉不能雜，由來有低昂。治術粲然判，純駁殊霸王。嗟彼經世士，慨慕虞與唐。高談祖仁義，末路宗管商。管商況愈下，且欲師宏羊。變未達今古，才原非富强。兵戎尚格鬥，郡國多瘡瘡。浮游挾功利，約束紛更張。名高易生愾，患伏能無防。誰意素絲練，變化爲蒼黃。

甲子行

甲子新從上元數，春來冰雪復風雨。雲陰連月凝不開，酷烈翻然奪和煦。王師昨歲收金閭，淮北渠魁亦已亡。頗聞花門遁隴表，白下殘寇不自保。蚩尤旬始氣漸沒，朝廷政令未有闕。四方翹首中興期，凜冽非時孰爲發。豺狼摩牙日啖尸，軍士殺降或有之。復恐蜃鱷恣翻覆，不然

權算搜無遺。迂儒詹詹五行傳，陰氣侵凌幾曾見。妄意恒寒由咎徵，天道從來不虛變。勤勞旦奭翼宗周，方召能專闕外謀。回天捧日何人事，嫠婦徒勞涕泪流。

始雷繼以霰

正苦蒙陰盛，中天走電雷。翻驅飛霰集，未裂凍雲開。鴻雁歸仍阻，蛟龍夢乍回。誰扶陽德健，震疊奮雄才。

天道篇

天道幽且元，四序何曾愆？吾惟見夾鐘少陽之月，熙陽桃李爭暄妍，淑氣遍噓山與川。今者實駭異，朔風號且厲。五旬垂陰雲，三辰掩光氣。孟春冰雪深丈餘，仲月雨霰復相繼。嚴寒中肌骨，縮瑟無可避。麥苗凍欲槁，農夫眼垂淚。米鹽并騰踴，民命難爲計。吾聞北荒冰海光皚皚，黑龍燭射寒門開。得非夸娥之子戲負移此來，元冥徙南土，勾芒色如灰。鄒生死骨已千載，安得吹律生春哉。或云靈修乃在，太清之表浩茫茫，天上不置靈臺郎。寒燠任差忒，豈念黔首飢且僵？又云陰迫陽厥咎乖其常，容成不可作，誰與叩雲閭？君不見洪荒古史多恢奇，補天煉石傳有之。十陽涿水并爭出，災添乃在唐堯時。下土膠所見，妄以管蠡窺天道。幽元且莫測，何況人事翻覆安能知？

寒 色

黯黯天如墨，冥冥雨似麻。風林墮寒色，泥巷送春華。候舛誰爲沴，愁來未有涯。芳辰今過半，夢不到鶯花。

風雨不止

忽失暄和序，將疑橐籥停。草痕殊未活，柳夢不曾醒。風雨徒淒厲，湖山總晦冥。廣川灾異對，誰與獻朝廷。

舟次感春

東風昨日來，不散湖雲冷。岸經冰雪餘，物色尚淒警。平原野燒痕，寒夢吹未醒。曾無稊柳枝，搖蕩烟波影。安望舒紅英，芳菲鬥桃杏。羈客自感春，慨嘆未能屏。豈無岩穴英，繩轡韞奇穎。風雲每後時，矧曰冀牛鼎。芳序驚如流，壯心徒自迴。舟行千里餘，所見但荒梗。無人問釣徒，寂寂水天永。

沙津解纜口占與耀卿西垣錄別

揮手津亭楊柳風，天涯離緒略相同。春江綠漲西陵峽，日夜將愁下渚宮。

春杪偕諸君自西陵峽進舟至黃牛峽而返

一舸疑無路，雙厓不可梯。扃連巴國徼，雄壓楚天西。曦月光多匿，陰晴象忽迷。峽游輕試險，直爲聽猿啼。

澣玉蝦蟆碚，名泉舊有聞。潛逃天上魄，寒噴石間雲。淋炙千年炮，斑斕萬古紋。子陽徙井底，笑汝伏江濱。

古木森虧蔽，居人謝往還。峰奇純戴石，瀑怒迸搖山。熊豹憑依阻，磨麕徑隧間。岩扉留洞壑，仙去不曾關。

開闢伊誰力？神工運斧難。危岩摩漢近，餘麓插江蟠。日作孤光掣，

天容一綫看。夸娥如遣負，地軸始能安。

巴船爭奮棹，危命擲湍流。旅客多清淚，灘聲易白頭。晴天翻雨色，險地謝豪游。深壑蛟龍卧，將無窟宅憂。

亂石驚濤外，刑牲似后宮。天留傾覆戒，人答聖神功。野鳥啼芳樹，哀猿嘯晚風。黃牛開導勢，烟雨惜冥濛。

放棹黃陵廟，回舟陸抗城。年衰初入峽，春老不逢晴。東下風猶逆，西來漲又生。自嗟才力減，得句少人驚。

守之明經携明高帝自撰皇陵碑拓本屬題

運啓英雄主，天開混壹期。世功非契稷，舊業異邠岐。濠泗真人地，山陵帝者儀。追崇灑宸翰，水木不勝悲。

播越潛龍日，艱難逐鹿年。湯征方革命，舜慕獨終天。豐沛靈長接，滄桑運易遷。所嗟銅馬熾，蔥鬱委烽烟。

龔叔雨同年擢黔藩入覲遇諸夷陵賦詩贈別

江陵相遇復夷陵，握手惟驚鬢雪增。瘴癘千山馳入覲，風塵四海望中興。訐謨次第天衢獻，賜命便蕃晝接承。今日正需元凱佐，朝班方倚作凝丞。

當日詞臣侍禁林，茲行仍謁玉墀陰。黃圖山海形原壯，紫殿風雲氣自深。鸞鳳總諧鳴盛律，夔龍均抱濟時心。燕臺朋舊如相問，爲道曾無梁甫吟。

王殿臣茂才邀同諸君登孝子岩仍置酒竟日而歸

喚渡朝霞散，攀岩曲磴分。林光射墟莽，巒翠撲江雲。嘯傲邱中賞，壺觴物外群。回舟清興洽，樓堞挂斜曛。

題姜孝子祠

一角溪山畔，千年孝子祠。蜀江同祀典，楚俗式民彝。泉鯉靈疑躍，巢烏性總慈。何言風景美，淳性繫人思。

答耀卿

當風鼓瑤瑟，裊裊朱絃音。曲調亦何古，江水亦何深。誰人爲此奏，遠道貽朋簪。峽江下荆渚，連山多嶽岑。江山杳無盡，離思浩難任。烽塵暗南北，戎馬猶交侵。游麟未服輓，飛鳳不在林。豈無俊與杰，草間多銷沈。世難且未息，安知真宰心。願言保金石，無事徒沾襟。

僧邸大破群賊於楚豫之郊野夫謬計謂可 乘勢進拔建康如反掌賦詩志冀望焉

名冠中興將，勛高異姓王。聞聲啼乞活，卷甲蹴奔亡。不睹騷除易，誰知殺伐張。人言師過處，隴畝自耕桑。

南卒誇驍銳，何如朔騎精。九天攻莫測，萬帳寂無聲。楚豫金湯固，江淮草木驚。直須乘破竹，東拔建康城。

鐵馬臨江上，瑠戈指石頭。但瞻麾蓋至，立獻檻車囚。醜虜亡無日，兵機迅莫留。奇功須上將，一鼓復神州。

寄贈鄂生太守

智勇萬夫英，馳驅百戰苦。投足觸譏讒，險乃甚豺虎。不死有天幸，低頭甘對簿。罷遣帳下兒，脉脉復簪組。領郡巴山間，綢繆徹桑土。榛莽次第除，春陽亦徐煦。暴者戢雄鷲，願者奮干櫓。介居秦蜀中，屹立

壯門戶。規畫甫及施，干城效可睹。湘東近出將，揮戈逐猓獮。誰知有黔士，可與韓白伍。羸然短小軀，浩浩綜文武。英略盡韜藏，勞心作召杜。若得起登壇，專制建旗鼓。麼麼乞浩徒，疾掃勝風雨。何人效馮唐，頗牧薦吾主。

漢 北

漢北且千里，薦爲豺虎居。備多力益薄，銅馬遂乘虛。名王提朔騎，斬刈血成渠。賊勢雖披靡，滋蔓難盡鋤。士馬不宿飽，凋劫憂軍儲。苦鬥日不止，狡謀慮伏狙。盍不運奇略，一舉潰癰疽。漢廣夏方漲，浮天勢有餘。決之灌賊壘，原野皆淪胥。赤眉百萬衆，可使化爲魚。水攻古所尚，舍是患不除。寄言仗鉞者，浪戰徒紛拏。不聞蝮蛇毒，斷腕安能徐。

奉憶申甫師零陵

豺狼仍率野，麟鳳未歸朝。迹異衡山隱，心寧魏闕遙。潘輿隨轉徙，蔣徑任蕭條。時有岩廊夢，猶依北斗杓。

題 畫

山外斜陽柳外舟，憑軒長嘯俯滄洲。天涯正憶鷗邊宅，高閣澄江萬里秋。

師克金陵志喜

空中赤焰流天關，天狗隆隆河鼓間。奔騰直度女牛次，東南正墮金陵山。獍穴梟巢逾十載，一朝天意付菹醢。猛士休誇不世功，黃金填壑

骨填海。先是五月廿七夜，天狗起河鼓下，赤焰燒空有聲，隆隆東南墮。滅賊之兆也。

天生龍虎帝王宅，豈汝麼麼敢稱逆。跳梁自負頭觸山，禍至安能逃裂磔。赫赫朝廷拱百靈，妄矜詐力盜關扃。妖腰亂領何須惜，徒使山川蒙穢腥。

自從蠻獠陷江表，文物衣冠迹如掃。酷倍羿浞浮蚩尤，日刈生靈如刈草。王師洗劍開荆榛，如天覆燾歸皇仁。不患天家少恩澤，但嗟鋒鏑無遺民。

增陴累堞高至天，塢金窖粟何連連。怒行屠戮喜歌舞，自謂坐支年復年。九天赤電燒蛇穴，垂死豺狼自相齧。凶魂雨黑無號聲，霹靂一震萬鬼滅。

亂賊紛紛多竊附，爭言建業可長據。一朝惡木槪本根，柯葉焉能更枝梧。拔幟朝登白下城，潢池群盜盡亡精。懸知露布經過處，不待皇家用一兵。

捷書飛奏甘泉宮，何數周家江漢功。告廟賜酺頒懋賞，虎臣方晉侯與公。兩宮歡顏慰文母，陛下聖文復神武。冲齡撥亂成中興，更望憂勤法聖祖。

夷陵立秋

山城猶未散炎蒸，坐看中宵轉玉繩。天上捷書傳北極，人間秋色下西陵。漫游江海成長往，垂老乾坤喜中興。翹首金風動閭闔，鷓鴣終不羨溟鵬。

中丞嚴公舟至夷陵卧病不能往謁以詩迓之

開府忠勤鎮上游，東南將帥復神州。超然謝却功名際，閑繫萊公野渡舟。

奉送中丞嚴公假還西蜀

六月王師獻捷音，中丞歸卧峽雲深。息機翻在論功日，歷險彌堅進德心。辛苦干城肩毅力，瘡痍籌筆萃憂襟。孤臣彊直酬知遇，才略終叨日照臨。

文饒城武後先來，帥蜀英豪盡壯哉。三嘆直追同調賞，千秋均抱出群才。甲兵淨洗風雲會，綸綍優頒節鉞開。錦水花溪雖好在，東山何事久徘徊？

薦表曾勞入品題，潛郎只自戀幽栖。纔蘇病骨金飆下，更挂離心玉壘西。威鳳暫令嘲燕雀，溟鵬還起軼虹霓。九州待灑商霖潤，翹首天書賁紫泥。

病 起

幾日掩關卧，不知秋草深。今晨步簷宇，苔蔓交相侵。萬象忽我赴，納之方寸襟。塊獨嗒若喪，會通甫自今。蔽徹始昭曠，障生乃鬱沈。即此悟靈府，開室理可尋。雷雨峽中至，颯爽洗高林。積疴略已減，據梧發我吟。吟成熟與和，亦不索賞音。寥寥碧空外，元鶴知余心。

歸 思

去國一千里，歸心日何東。雁來秋塞外，人滯峽雲中。負米猶憐遠，懷鉛莫論功。征帆遲未發，倚棹待西風。

物 態

海燕有歸興，山蟬無噫音。空廊響疏雨，暗峽生秋陰。游類馬卿倦，

病成莊舄吟。閑中觀物態，羈緒壯難任。

理髮嘆

秋來髮種種，病起不勝梳。搖落隨櫛下，委地猶埽除。槁葉避霜信，長與柯條疏。昔年盛鬢髮，壯氣迫嚴徐。謂當奮霄漢，高步誰不如。林間久塌翼，鳳舉不得摎。晚節謝郎署，二毛賦閑居。及今益衰白，老禿嗟中書。麟閣不敢望，何論承明廬。志業百未就，將隨樵與漁。奪我綠鬢去，朱顏非復初。飛光若流水，東溟歸尾閭。安得起壯士，咸池翻日車。

漫興

白露下林皋，秋江激暮濤。猿悲啼峽急，鷹壯掣雲高。客興頻懷土，詩情半入騷。貂蟬爭拔起，悔不事龍韜。

蛩聲

蛩聲如潑水，曉夢頓驚殘。爲爾秋心碎，因誰怨調翻。星霜催急節，今古續憂端。何待秦青唱，惻然摧肺肝。

舟發夷陵晚泊董市

舉棹過三縣，維舟日未斜。雲陰濃作暝，江氣壯浮沙。送客殘蟬急，投林暮鳥譁。渚宮遙在望，別久亦如家。

舟行風逆

月峽荆門安在哉？雲深東不辨章臺。浮青樹接天邊合，捲白江穿霧

裏來。鳴雁似聞衝雨過，泛鷗時見避風回。故園秋色行將老，望裏歸帆日日猜。

舟過松滋

一柱觀何在，滄洲空自環。雲低多在水，岸闊漸無山。雨勢斜偏重，江流去不閑。西風能送客，獨爲旅人慳。

將至沙津以詩報耀卿

楊花如雪別芳津，攬佩秋窗月滿輪。卧病憐予馳慰問，高歌逢汝吐嶙峋。休誇帶礪歸貔虎，猶待邱園起鳳麟。郗桂一枝高自許，英聲端不讓他人。

歸舟爲風雨所滯

秋陰日日作風雨，能使滄江滯行旅。枉渚回汀黯不開，楚臺梁苑渺何許。千里辭家汗漫游，華顛無夢到封侯。但借西風吹五兩，秋波歸釣白螺洲。

湖濱舟次口占與耀卿錄別

翦燭談方輟，鳴榔忽惘然。客心分繞樹，秋水壯浮天。鸞鵠摩霄路，鷗鳬結社緣。回帆期見訪，遲汝孝廉船。

寄訊汪梅村先生聞其將歸白下

初聞露布雜悲歡，愁裏鄉園未忍看。將帥貂蟬勛赫奕，山川龍虎氣

凋殘。燐飛斷礎秋陰黑，潮打荒城夜月寒。亂後白頭歸思切，荆榛何處問長干。

九日邁園獨眺

生平值重九，鄉園回首勞。今茲憩故里，豁我心鬱陶。山墅閱兵燹，掩蔽多蓬蒿。修桐及槐柏，竦擢爭相高。陟磴縱遐觀，百里明纖毫。參差露洲渚，迤邐分林皋。邱壘接遠近，疊翠相周遭。江湖并一氣，壯哉何滔滔。朔風猛相蹴，壁立揚飛濤。忽然觸奇興，將策冠山鰲。意氣徒慷慨，鬢髮驚蕭騷。惟欣櫓槍斂，行見戈甲輶。適我潤盤願，暮齒嬉且遨。年年對黃菊，舉勺傾香醪。尚堪逐年少，共鬥詩中豪。

季秋望夜江皋步月

秋陽亦太甚，乃與炎歊同。向夕步江介，思欲延涼風。冰輪揭圓影，皎皎懸當空。昔年玩秋月，多藉江流雄。光景兩激蕩，翻動蛟龍宮。精芒射六合，奇變安能窮。今來潦忽斂，閑以洲渚重。遙山隱烟霧，誰爲發其蒙。聯檣集賈舶，擾擾如蠅蠁。不睹浩瀚勢，焉得開心胸。興闌舍之去，歸來卷簾櫳。何當挾鵬翼，往矣觀方蓬。

晚秋陽亢彌甚

季秋節候變暄燠，晝食夜眠汗相續。千里百里揚塵沙，烈烈南風號萬木。頗聞岳鄂連蘄黃，歷夏不雨驕秋陽。二麥至今未入土，流庸載道吁可傷。齊安烽火久不息，上將連營未敢逼。得漏鋒刃猶饋軍，哀此一方陷荆棘。今年滅賊誠大慶，陽德何爲久乖令。得非天尊吾皇仁，意在黜佞沛寬政。東南田租暫賜蠲，詔下罷算車與船。伐檀濡鵝盡斥退，登崇悉用憂國賢。上天眷佑無窮已，聖德感天不移晷。小臣無路達芻蕘，

何人附進延恩匭。

詩寄遇隆兩兒

今歲闌期展至九月

節過重九曾無雨，月比中秋分外明。紫氣衝霄揮彩筆，雙飛龍劍出豐城。

將往西陵遲隆兒未歸

返棹風猶滯，滄江復阻長。秋晴多見月，候暖未成霜。鳳管和聲律，龍文出匣光。汝歸吾即發，亦已戒征艎。

湖舟曉泛

朔雁聲中客路長，湖心曉色混天光。朝暉忽上千帆影，水國猶遲萬樹霜。尚有傳烽驚沔鄂，惜無飛將救蘄黃。潛夫皓首仍江海，獨自憂時未敢忘。

舟行雜述

颯颯衰荷亂，蕭蕭荒荻深。宿雲開樹杪，飛鳥點湖心。鄰雜飢穰判，田兼潦早侵。誰能籌蓄洩，閭里豁憂襟。

帆轉汀仍合，橋回浦又分。碧鱗波蕩日，綠髮樹籠雲。甌窶簞皆滿，幽歛簫共聞。鷗鳬雜鵝鸕，來往亦爲群。

顧杼鄰相競，編茅戶并忙。人歸魚躍留，稼納雀趨場。碧草還凝露，青楓未覺霜。行徒盡頰汗，誰道減秋陽。

冬初暄特甚，節候得無差。宿麥難投種，春桃或誤花。蜚吟朝不斷，蟲聚夕猶譁。雨澤何由望，湖雲又變霞。

早冬溯江赴峽州

輕舟重溯大江潯，江上群山喜盍簪。漲落白沙鳴素瀨，村晴紅樹綴青林。滄洲帆影何曾動，平野霜華亦未侵。朋舊西陵各無恙，猶堪文酒慰冬心。

十月十三夜雷電交作微雨輒止

秋旱久無雨，冬晴復有雷。雲沈千樹失，電掠萬山來。灑澤功何淺，屯膏意莫回。愆陽誠已過，冰雪恐爲災。

曉舟上荊門峽

江勢會岷源，江光蕩曉昏。灘聲雄楚塞，日色射荊門。故壘銷都盡，飛仙迹尚存。時平惟釣艇，結網聚成村。

答耀鄉^[1]對雪見憶之作

去年飛雪共憑闌，對雪今成兩地看。命駕遙憐荆渚隔，泛舟深阻峽門寒。梁園授簡才非忝，郢曲登臺和獨難。念汝揮毫多逸興，隨風珠玉滿江干。

鮑帥追粵逆於江右擒其僞王及其 凶族逆將聞當檻致諸京

螻蟻君臣面縛俱，章門飛捷達皇都。死灰頓息焚餘燼，疏網仍歸闕下俘。武庫漆頭當示儆，藁街濺血尚嫌污。神靈正翊中興運，文德今看

殿陸敷。

左纛國中聊竊號，蹇人地上亦稱王。梟雄有力終顛覆，豎子無成只滅亡。鈴語早占生縛曜，郡名初改喜擒昌。參夷凶族無遺種，始信天威肅萬方。《北魏書·地形志》神龜元年，世祖禽赫連昌仍置禽昌郡，即漢晉之北屈也。

仙芝縱死仍巢賊，邢杲雖亡有葛榮。逋竄蠻奴多悍突，傳聞閩海復縱橫。五羊乘障宜增戍，萬馬窮追未罷兵。宵旰尚須煩聖慮，兢兢保泰在功成。

峽州旅次書懷

倦客天涯歲易闌，峽江日夜朔風寒。鷹驕目已輕狐兔，鴻遠心猶逐鳳鸞。江海盡聞兵氣解，征徭仍冀德音寬。潛夫不厭山中老，白首誰彈貢禹冠。

燕坐遣悶

雨雪凋年滯客星，更無車騎過元亭。峽雲當晝低如墜，林霰乘風驟復停。侵徑莓苔何寂寂，垂檐橘柚故青青。鄉園正憶梅將綻，憐汝幽芳礪壑局。

鄂生太守貽厚樸花歌以報之

產終南巴山老林中，三十年始一花，皆附正幹，不綴旁枝，雜茗飲中服之，利關鬲，理氣最有功

巴山北接終南青，中有開闢未洩之精靈。深林大藥樸尤異，三十年吐奇花馨。綏定太守采貽我，封題充筍百餘朵。大如兒拳鏗有聲，發絨不散流雲裏。書言厥性無不宜，可配茗飲沁心脾。通利關鬲導氣海，論功遠勝蓂與蓂。炎帝圖經漏未錄，當時徑路閉岩谷。歧伯雷公不識名，扁鵲華陀豈寓目。元氣鬱勃千萬年，胚胎忽坼葩華妍。亦如力牧及風后，夢感軒皇非偶然。桓桓太守萬人將，書生起翦亦何壯。衆口嘵嘵尚鑠金，